



कवि-परिचय :

नाम : राम सिंहासन सिंह विद्यार्थी

जनम-तिथि : 28.12.1930

जनम-अस्थान : सैदनपुर, पो०-नंदलालापाद, गौरीचक, पटना

सिच्छा : आइ.ए.

उनकर मिरतु 2004 ई० बिहार हिंदी साहित्य सम्मेलन पटना के प्रांगण में स्थित आवास में हो गेल। उनकर पिता के नाम चंद्रिका सिंह हल।

1949 ई० में पटना विश्वविद्यालय से आइ.ए. के परिच्छा पास कयलन हल। ऊ महाकवि निराला जइसन अक्खड़ सुभाव के फक्कड़ कवि हलन। एगो मगही में कविता संग्रह (जागरना) लिख के ऊ मगही साहित जगत में अमर हो गेलन। उनकर कविता में परकिरती आठ, किसान के दुःख भरल जीवन के बरनन हे। ऊ किसान आठ नवजवान के जागरन के गीत लिखके मगही साहित के भंडार भर देलन।

‘इसरा महादे’ सीर्सक कविता में ऊ किसान जीवन के एगो जथार्थ चित्रन कयलन हे। किसान, खेत, खरिहान, बिया, बिहन, इसरा आठ सहादे के अइसन बरनन कयलन हे कि सब कुछ आँख के सामने एगो चित्र जइसन आ जा हे।

किसान के जीवन केतना मेहनती आठ करमठ होवऽ हे ओकर साफ-साफ चित्रन उनकर कविता में मिलऽ हे।

इसरा महादे

बैल धरफरायल

हर हरहरायल,

मारे टिटकारी सहादे

अररर, बढल चल, चढल चल....

घड़ले सिराउर,
आ ठामे इसरा महादे!

तोरे पर 'दम' हे, तोरे पर 'हम' हे,
दिन बीत रहल हे पातर।
चल मोर सौरा, चल मोर मैना;
कड़ले चल पूरा दू आँतर।।

अररर, बढ़ल चल, चढ़ल चल...

अज्भुका काम आज्भे करऽ पूरा,
कल्हे पर करऽ नय भरोसा।
काहे कसरावल तेजी देखड़ते चल,
फिन न पलटतइ पासा।।

अररर, बढ़ल चल, चढ़ल चल....

आसकत पूते किसाने नासे हे,
मत बन तू अलुआरासी।
खेत उखरतउ रहमे कहीं के न,
भागमे फिन गाँव छोर कासी।

अररर, बढ़ल चल, चढ़ल चल...

नगिचल दिन, मारले चल हो भोला,
न तो अड़तउ साँझ अन्हरिया।
बनतउ जपाल जिनगी सब सुन्हाके,
लउकतउ न अणन डगरिया।

अररर, बढ़ल चल, चढ़ल चल...

बमकल चलऽ हो हरदेव एतना-सा
वसुधा के छोड़ नय भीठ।

जानल-बुजफल हमनीके कुरुअखेत,
आगे चल बन के तू ढीठ॥

अररर, बढल चल, चढल चल...

लपकल चल, फपकल चल सोना,
बढल चल जमीं पर चाटी बाज के।
तोरे परेरना रचिअइ कविता,
धरती के पाटी पर नाज के॥

अररर, बढल चल, चढल चल...

तू ही मोर हाथ-गोर, तोरे पर
बान्हले हिआव ही कसके।
फाँद दिवाल जस सामकरन घोड़ा,
रहे न घोड़सार के बस के॥

अररर, बढल चल, चढल चल...

करऽ समांग अइसन कि माला बाजे,
मसूर गाजे खरिहानी।
ड्योढ़ी बइठल गुरछिहऽ बसहा,
हम 'सहदेवा' बनब शिव-दानी॥

अररर, बढल चल, चढल चल...

फेरबड़ देन अब बियाहबड़ बेटा,
भट्टल घरवा हम उठायब।
तोरे कमाई पर भाईबन न्योतम,
बच्चल अन्न हम जुठायब॥

अररर, बढल चल, चढल चल...

अभ्यास-प्रश्न

मौखिक :

1. इसरा महादे केकरा कहल गेल हे ?
2. "अररर बढल चल, चढल चल" के की माने हे ?
3. चल मोर सौरा, चल मोर मैना... केकरा कहल गेल हे ?
4. गाँव छोड़ के कासी जाए के मतलब काहे ?
5. "तोरे परेरना रचअइ कविता" में कवि का कहेला चाह रहलन हे ?
6. किसान महादे के भरोसे कउन-कउन काम करेला चाह रहलन हे ?

लिखित :

1. किसान टिटकारी कब पारऽ हे, ओकर उद्देश्य बतावऽ ।
2. इसरा महादे पर किसान के का-का भरोसा हे ?
3. किसान आज के काम आज्भे काहे करेला चाह रहल हे ?
4. किसान के अपन डगर कब न सूभत ?
5. आसकत पूते किसाने नासे के भाव बतावऽ ।
6. किसान केकरा पर हिआव बान्हले हे आउ काहे ?
7. नीचे लिखल के सप्रसंग व्याख्या करऽ :

फेरबइ देन, बियाहबइ बेटा,
भट्टल घर हम उठायब।
तोरे कमाई पर भाईबन न्योतम,
बच्चल अन्न हम जुठायब।
अज्भुका काम आज्भे करऽ पूरा,
कल्हे पर करऽ नय भरोसा।

भासा-अध्ययन :

1. इसरा महादे कविता के सिल्प आउ भाव-सौंदर्य बतावऽ ।
2. नीचे लिखल सबद के सहचर सबद बतावऽ

(क) जानल

(ख) खेत

(ग) साँभ

(घ) लपकल

(च) जमीं

योग्यता-विस्तार :

1. इसरा महादे कविता से संबंधित कोई दोसर कविता चुन के लावऽ आउ ओकर काव्य पाठ कवि गोस्ती में करऽ।
2. खाँटी मगही सबद के एगो सूची बनावे सिच्छक के देखावऽ।

सब्दार्थ :

आसकत	:	आलसी
बमकल	:	जोस में, मन बढ़ल
ठामे	:	नजदीक में
पातर	:	पतला
लपकल	:	तेजी से
हिआव	:	साहस
ड्योढ़ी	:	घर में जायेवाला रस्ता
भट्टल	:	बिगड़ल, टूटल